

# TikTok cumò al fevele in marilenghe cun “Tic e Tac Furlan”

Il progjet de ARLeF al è daûr a vê un sucès grant in graciis dai videos de mestre Greta e de gjate Preta



Cun passe 4500 followers, cuasi 40 mil like e 900 mil visualizacions “**Tic e Tac Furlan**”, il gnûf canâl TikTok par imparâ la marilenghe divertintsi, al è bielzà un sucès! Il progjet de ARLeF al è partît il mês di Setembar stât e in curt al è dâur a fâsi cognossi sul famôs social in grazie de simpatie di Greta Fabbro, insegnante di 37 agns che intai videos e je acompagnade ancje di Preta, une gjatute brasiliane “cjacarone”.

Une aventure, chê di Greta, scomençade par cês dopo vê frecuentât il cors de lres “Tecnichis di promoziun linguistiche e culturâl furlane”, promovût de Agenzie Regjonâl pe Lenghe Furlane. Di chê esperience formative e je nassude la idee di cjatâ une maniere divertente, e par ducj, par insegnâ la lenghe. Cun di fat, Greta e je une insegnante de scuele de infanzie che e à za vût mût di insegnâ ancje tai cors par adults: *«O ai simpri cirût di tirâ fûr la mê part plui lizere, parcè che divertintsi si puedin imparâ lis robis miôr»* e al è cussì che e à imbastît “Tic e Tac Furlan”. Sul canâl si cjatin i temis plui svariâts cuntune schirie di rubrichis tant che “FurlanLenghe” par sclari che cognossi il furlan al jude l’aprendiment di chês altris lenghis. Chest al è un teme che. Un teme che la nestre tiktoker e à une vore a cjâr: *«E je une robe che o puarti indenant di simpri e che o cîr di passâ ancje tai videos. Par me il furlan al è la base»*. Jê, cun di fat, di San Vit di Feagne e je lade in Brasil li che e je restade par 12 agns. E fevele portughês cognòs portughês, spagnûl e inglès e *«des lenghis forestis che o sai, o torni simpri indaûr sul furlan. Se o pensi une peraule in spagnûl, ma ancje in altris lenghis, e o cîr une assonance, al è plui facil che o “pescji” dal furlan»*.